

Pro Patria – Mantegnair e tgirar ils bains culturals

■ **Las emnas avant la festa naziunala svizra vendan mintgamai millis amis da la Pro Patria las ensainas dal 1. d'avust. E mintg'onn davent dal matg venda la Pro Patria sias novas marcas postalas. Ellas orneschan cartulinas postalas, brevs e pachets e vegnan era rinnadas. Ils supplements sin quests products van exclusivamain a favur da projects d'util public.** La Pro Patria è resortida dal Comité per la festa naziunala svizra ch'è sa furmada il 1909. L'intent era da dar a la festa naziunala in senn pli profund e da pussibilitar a tuts in act da solidaritad en favur da la patria. Per quest intent ha la Pro Patria partì ad edì dal 1910 mintgamai ina carta postala speziala dal 1. d'avust. Cun l'introducziun da las marcas postalas da la Pro Patria (dapi il 1938) è il supplement d'utilitad publica sin las cartas postalas crudà davent. Sco cartas d'art en ellas dentant res-



tadas ordvart popularas fin en ils onns 1960. Ultra da quai aveva la Pro Patria gia introduci l'onn 1923 las ensainas tradiziunals dal 1. d'avust sco ulteriur element per popularisar l'idea e l'intent da la fundaziun.

En quasi tut las vischnancas da la Svizra s'engaschan millis voluntarias e voluntaris per las collectas. Spezialmain partecipadas en las scolas. La Pro Patria è ina fundaziun autonoma che na vegn betg subvenziunada dal maun public. Ella è in'ovra d'utilitad publica da la populaziun svizra. Il retgav da las collectas munta a radund trais milliuns francs l'onn e vegn utilisà per mantegnair e tgirar ils bains culturals svizzers.

La Pro Patria en il Grischun

La Pro Patria sustegna il mantegniment e la tgrira dals bains culturals en l'entira Svizra. Ch'ella è spezialmain activa en il Grischun sa resulta da la diversitad culturala da questa regiun. Il Grischun sco chantun il pli grond da la Svizra posseda in stgazi cultural d'ina ritgezza extraordinaria. Quella è d'attribuir surtut al relieu da la terra cun sias immensas differenzas d'autozza sur mar da quasi 4000 m (dal Piz Bernina a la planira da San Vittore), a la geologia, a la spessa rait d'auas cun trais sparta-auas europeics ed a la lunga isolaziun da bleras valladas periferas.

Cun trais linguatgs naziunals, tschintg idioms rumantschs e divers dialects sa mussa questa ritgezza er en il sector linguistic.

Ils davos 15 onns ha la Pro Patria sustegnì radund 150 projects culturals da relevanza, en media pia 10 projects l'onn. Ils pli impurtants secturs d'engaschament en la restauraziun da baselgias, chapluttas e d'alters edifizis da valor istoric-culturala, l'installaziun da museums locals e regionalis, il mantegniment da mulins, resgias, punts da lain e da crap, fortizzas e chastels, il sustegniment da mesiras spezialas per promover la diversitad linguistica sco p.ex. manuals rumantschs, projects spezialis da la Pro Grigioni Italiano u da l'Uniun dals Gualsers, la promoziun da scolas da musica, da bibliotecas regionalas e localas sco er d'uniuns da teater e d'implants da temp liber.

La Pro Patria guida a finanziar projects che fissan senza ses sustegn be stentusamain u insumma betg realisabels. Perquai è sia activitad considerablmain pli gronda en las regiuns muntagnardas ed en las regiuns economicamain dischavantiadas ch'en las aglomeraziuns economicamain fermas da la Bassa. En quest senn resulta ina redistribuziun dals meds finanzials collectads. En ils chantuns bainstants vegnan investads en media tranter 20 e 50% dals retgavs da las collectas fatgas en quests chantuns, en chantuns sco il Grischun percenter trais fin tschintg giadas daplì.

Exempels per l'engaschament da la Pro Patria en il Grischun

Alea da Sent: Aleas, damai vias e sendas flancadas d'ina u da duas varts cun plantas, vegnivan plantadas pli baud blier pli savens che oz. Ellas en da gronda valor, perquai ch'ellas dattan sumbriva, enrigeschan il maletg e l'ecologia da la cuntrada e procuran schizunt ina buna guida optica al traffic motorisà. Novas aleas vegnan plantadas oz memia pauc pervia dals custs d'investiziun e da mantegniment. Als posts responsabels per las vias manca savens er la chapientscha per las mesiras da tgrira necessarias.

In'alea istorica da speziala bellezza s'extenda en l'Engiadina Bassa sur plirs kilometers per lung da la via principala tran«Pro Patria» dapi generaziuns: cartas postalas, marcas postalas ed ensainas dal 1. d'avust.ter Scuol e Sent. Il Fonds Landschaft Schweiz è s'engaschà ensemen cun la Pro Patria per renovar e tgirar questa alea ed uschia procurar ad ella in bun avegnir per ils proxims decennis.



«Pro Patria» dapi generaziuns: cartas postalas, marcas postalas ed ensainas dal 1. d'avust.

Bavetta da Tarasp: Las funtaunas d'aua minerala en l'Engiadina Bassa en encunuschantas dapi tschientaners. Cun l'entschatta dal turissem da cura en il 19avel tschientaner en bleras funtaunas mineralas vegnidas avertas ed utilisadas pli e pli fitg. La magnifica bavetta a Tarasp è vegnida construida il 1875. Pliras giadas al di vegnivan qua ils giasts per far la cura da baiver. Sper baiver l'aua medegianta eran las activitads socialas da gronda impurtanza. En il portic cun ina lunghezza da quasi tschient meters pudevian ins flunar e discutir, en ina nischa sunava l'orchester da cura e numerusas butias offrivan souvenirs. Cun la segunda guerra mundiala ha il turissem da cura pers sia impurtanza. Bain vegn anc oz di per di servi l'aua minerala, la bavetta va dentant pli e pli en decadenza. En collavuraziun cun la Tgrira da monuments chantunala e cun la vischnanca vulessan purtaders privats mantegnair quest edifizì, l'engrondir ad in center da l'aua ed

uschia svegliar el a nova vita. La Pro Patria sustegna il mantegniment da questa ovra architectonica singulara en l'Engiadina.

Ruina dal chastè da Belfort: La ruina è situada a l'ost da Brinzauls sur la via per Alvagni sin in grip tranter duas chavorgias profundas. Dal chastè principal (chastè sura) en sa mantegnids la tur principala cun in edifizì d'abitar annex da tschintg plauns (al nord), ina cisterna radunda en la curt e l'imposant tract meridional, renovà pliras giadas. Ina stgala tagliada en il grip collia la curt cun l'avantchastè (chastè sut). Las parts las pli veglias dateschan circa da l'onn 1200. Il chastè da Belfort, attestà per l'emprima giada il 1222, era la sedia principala dals baruns da Vaz. Suenter l'extincziun da la lingia masculina (1338) è Belfort passà als conts da Toggenburg ed è daventà la sedia da la prefectura. Ils 14 da mars 1499 han assagli ils Grischuns il chastè ed han mess el en tschendra. La Pro Pa-

tria ha sustegnì las mesiras da sanaziun dals onns 2002–2007.

Alp Stgegia a Medel/Lucmagn: L'Alp Stgegia sin territori da la vischnanca da Medel è ord divers motivs in impurtant object cultural en la cuntrada. Ella sa chatta directamain sut il lai da fermada sper la veglia via dal Lucmagn che vegn frequentada oz stediain da viandantas e viandants e collia l'utilisaziun tradiziunala agrara sin radund 2000 meters sur mar cun l'economia d'electricitad moderna sviluppada fermamain ils onns 60. La culegna anc avant curt fermamain en decadenza cumpiglia a guardar pli exactamain ina gruppa fitg preziosa da tegias da crap cun ina funtauna, in pitschen plaz e la senda che traversa la gruppa. Interessanta è er la proprietad: L'alp appartegna a la vischnanca burgaisa da Dongio en Val dal Blegn ed è in dals paucs exempels d'ina alp tessinaisa en il Grischun.

Svilup dal vitg da Vrin: Vrin, la vischnanca da 300 abitantas ed abitants entadim la Val Lumnezia, persequiescha dapi radund diesch onns in concept da svilup original. Vrin vul mantegnair ses caracter agrar-artisanal cun integrar ils edifizis agrars e las interpresas da mastergnanza en il vitg. En il center da las stentas stat l'autonomia economica e culturala da la vischnanca. La Pro Patria sustegna la Pro Vrin che sa stenta da realisar quest concept da gronda impurtanza. Las contribuziuns da la Pro Patria vegnan impundidas per restauraziuns pretensiusas, ma er per edifizis novs da buna qualitat architectonica sco p.ex. stallas, la mazlaria che elavurescha la charn indigena, l'alp da chauras cun in manaschi progressiv sco er la stiva da morts sper la baselgia che cuntinuescha a moda moderna la cultura tradiziunala en relaziun cun la mort. Ils blers da quests projects ed edifizis promovids da la Pro Patria en connex cun quest concept en vegnids premiads – savens schizunt sin plaun internaziunal. Perquai è Vrin daventà il davos onns in lieu visità da pli e pli blera glieud engaschada culturalmain da l'entir mund.

La preschentaziun:

Dossier «Pro Patria»

Daplì infurmaziuns: chatta.ch/?hiid=833
www.chattà.ch



Alea da Sent.



Bavetta da Tarasp.
FOTOS: MAD